

# TULAFONO TAU FAAOFI O FAIAOGA 2015

## SAMOA

Faamatalaga e Faamalamalama ai

### **Faatomuaga**

Ua taumafai le Tulafono Tau Faaofi:

- e faatonutonu faaletulafono le faamauina o faiaoga, e aofia ai le tuuina atu o o latou tusi faamaonia o le faamauina ma laisene faa-faiaoga, le ituaiga auala e faamauina ai, taofia lē tumau o le faamauina, faalēaogāina ma le toe faamauina o faiaoga e le Fono a Faiaoga o Samoa (Fono);
- e aiaia le faavaeina o le Fono faatasi ai ma ona sui auai, galuega tauave, ma tulafono faafoe e faasino i ana fonotaga;
- e faatonutonu faaletulafono ai o tulaga faataatitia ma le solia ai o ia tulaga faataatitia tau tomai faapitoa; ma
- le faavaeina o le Komisi Faamasino lea e faapitoa mo le tagofiaina o faasea ma talosaga tete faasaga i faaiuga e faia e le Fono.

### **Fuaiupu:**

#### **VAEGA 1 FAATOMUAGA**

**Fuaiupu 1:** - ua taua ai e faapea, afai e pasia, o le a taua loa le Tulafono Tau Faaofi, o le Tulafono o Faiaoga 2015, ma e amata faamamaluina i le aso e filifilia e le Minisita.

**Fuaiupu 2:** - ua aiaia ai le faamatalaga manino o uiga o fuaitau.

**Fuaiupu 3:** - ua aiaia ai e faapea, o le a noatia ai le Malo ma faaaogā i faiaoga uma o le Malo, aoga a lotu, aoga tumaoti, ma faapena foi ma nofoaga autu o aoaoga amata. Ua aiaia ai foi e faapea, o le Tulafono ua fuafuaina o le a lē faaaogāina ia i latou o lo o faiaoga i aoaoga tau iunivesite.

**Fuaiupu 4:** - ua faamaonia ai le sootaga i le va o le Tulafono ua fuafuaina ma le faafaigaluegaina o faiaoga i lalo o le Tulafono o Galuega a le Malo 2004 po o i latou o lo o galulue tumaoti i lalo o so o se konekarate tau galuega.

**VAEGA 2  
FAAMAUINA O FAIAOGA**

*Vaevaega 1 - Tulaga Lautele*

- Fuaiupu 5:** - ua faasaina ai se tagata mai le galue o se faiaoga seia vagana ai ua i ai sona tusi faamaonia o le faamauina ma se laisene faa-faiaoga. Ua aiaia ai foi se lisi o le faasologa o igoa o tagata o i latou ia e le o noatia i tulaga faasaina i lalo o lenei fuaiupu, e pei o le avea ai ma se tagata o lo o aoaoina i tomai faa-faiaoga ma isi.
- Fuaiupu 6:** - ua aiaia ai mo le faavasegaina o le faamauina.
- Fuaiupu 7:** - ua tuuina atu ai le malosiaga i le Fono e faamatuu atu ai po o le teena o le faamauina ma faapea foi ona aiaia ai le umi o le vaitaimi o le faamauina.
- Fuaiupu 8:** - ua aiaia ai mo tulaga faasaina i le faamatuu atu o le faamauina.
- Fuaiupu 9:** - ua aiaia ai mo le faailoaina atu o faamaumauga tau soligatulafono o lo o aofia ai i faamatalaga e patino i tagata talosaga e ala i se talosaga a le Resitara i le Komesina o Leoleo ma le Loia Sili.

*Vaevaega 2 - Faamauina atoatoa*

- Fuaiupu 10:** - ua aiaia ai mo agavaa ma tomai manaomia o se tagata talosaga mo le faamauina atoatoa.
- Fuaiupu 11:** - ua aiaia ai mo le pepa faatumu o talosaga ma taualumaga mo le faamauina atoatoa.
- Fuaiupu 12:** - ua aiaia ai mo le faagasologa o se talosaga e le Fono.

*Vaevaega 3 - Faamauina lē tumau*

- Fuaiupu 13:** - ua aiaia ai mo agavaa ma tomai manaomia o se tagata talosaga mo le faamauina lē tumau.
- Fuaiupu 14:** - ua aiaia ai mo le pepa faatumu o talosaga ma taualumaga mo le faamauina lē tumau.

- Fuaiupu 15:** - ua aiaia ai mo talosaga e faaopoopo ai le taimi o le faamauina lē tumau.
- Fuaiupu 16:** - ua aiaia ai mo le faagasologa o se talosaga mo le faamauina lē tumau e le Fono.

*Vaevaega 4 - Tusi faamaonia o le faamauina ma tusi resitala*

- Fuaiupu 17:** - ua manaomia ai le Resitara e tuuina atu se tusi faamaonia o le faamauina atoatoa i se pepa faatumu faamaonia i le noatia ma fai fuafua i le totogiina o le totogifuapauina faatonuina e le tagata talosaga.
- Fuaiupu 18:** - ua manaomia ai le Resitara e tuuina atu se tusi faamaonia o le faamauina lē tumau i se pepa faatumu faamaonia i le noatia ma le fai fuafua i le totogifuapauina faatonuina e le tagata talosaga.
- Fuaiupu 19:** - ua aiaia ai mo se Tusi Resitala o Faiaoga (ua faamauina atoatoa ma ua faamauina lē tumau) ina ia tausia e le Resitara, lea e mafai ona sueina e tagata lautele vagana ai faamatalaga patino i tagata lava ia.

*Vaevaega 5 - Laisene faa-faiaoga*

- Fuaiupu 20:** - ua manaomia ai le Resitara e tuuina atu se laisene o le faamauina atoatoa i le taimi e faamatuu atu ai se tusi faamaonia o le faamauina atoatoa i se faiaoga. O lo o aiaia ai foi le umi o le vaitaimi o se laisene faa-faiaoga mo le faamauina atoatoa ma le malosiaga o le Fono e faamatuu atu ai le faaopoopoina o le taimi o se laisene faa-faiaoga.
- Fuaiupu 21:** - ua manaomia ai le Resitara e tuuina atu se laisene o le faamauina lē tumau i le taimi e faamatuu atu ai se tusi faamaonia o le faamauina lē tumau i se faiaoga. Ua aiaia ai foi le umi o le vaitaimi o se laisene faa-faiaoga mo le faamauina lē tumau.

*Vaevaega 6 - Taofia lē tumau, faalēaogāina ma le toe faamauina*

- Fuaiupu 22:** - ua tuuina atu ai le malosiaga i le Fono e taofia lē tumau ai le faamauina o se faiaoga i luga o mafuaaga o se amio lē pulea matuia tau tomai faapitoa, faamaonia faaletulafono i se soligatulafono ma isi.
- Fuaiupu 23:** - ua tuuina atu ai le malosiaga i le Fono e faalēaogāina ai le faamauina o se faiaoga i luga o mafuaaga o le faamaonia faaletulafono i se soligatulafono e tusa lava po o totonu o Samoa po o i se isi atunuu, ua faia se soligatulafono, ua solia se tuutuuga o le faamauina ma isi.
- Fuaiupu 24:** - ua aiaia ai mo le toe faamauina o se tagata talosaga i le tuanai ai o le lima (5) tausaga mai le aso na faalēaogāina ai po o ua faaitiitia le vaitaimi e lima (5) tausaga ona o ni tulaga faapitoa na aliae mai e ao ona faia i ai le faaiuga a le Fono.

**VAEGA 3  
PULEGA**

*Vaevaega 1 - Fono a Faiaoga o Samoa*

- Fuaiupu 25:** - ua aiaia ai le faavaeina o le Fono a Faiaoga o Samoa ma le tofiaina o ona sui auai.
- Fuaiupu 26:** - ua aiaia ai mo tulafono faafoe e faasino i le filifiliga o se Taitaifono ma vaitaimi o le tofi.
- Fuaiupu 27:** - ua aiaia ai le vaitaimi i le tofi ma totogi o se sui ua tofia.
- Fuaiupu 28:** - ua aiaia ai le taimi e mafai ai ona faamavae se sui tofia po o ua faamalolo tumau ma tualumaga ma le pepa faatumu e manaomia ina ia faia ai faapea. Ua faapea foi ona aiaia ai le taimi e avanoa ai le tulaga tofi o se sui ua tofia.
- Fuaiupu 29:** - ua aiaia ai galuega tauave a le Fono.
- Fuaiupu 30:** - ua aiaia ai tulafono faafoe e ao ona faaaogāina i se fonotaga a le Fono.

*Vaevaega 2 - O le Resitara*

- Fuaiupu 31:** - ua aiaia ai le tofiga o se Resitara i lalo o le Tulafono o Galuega a le Malo 2004, ma e fitoitonu ma, ma e i lalo o le faafoega a le Ofisa Sili o Pulega a le Matagaluega o Aoga, Taaloga ma Aganuu, ma le Fono.

**VAEGA 4  
TALOSAGA TETEE MA LE SOLIA O TULAGA  
FAATAATITIA TAU TOMAI FAAPITOA**

*Vaevaega 1 - Talosaga Tetee*

- Fuaiupu 32:** - ua aiaia ai le aia tatau a se tagata ua mafatia e talosaga tetee ai i so o se faaiuga a le Fono, faataitaiga: ua teena le faamauina atoatoa po o le faamauina lē tumau, faalēaogāina le faamauina ma isi.

*Vaevaega 2 - Amioga lē pulea tau tomai faapitoa*

- Fuaiupu 33:** - ua aiaia ai le faia o amioga lē pulea tau tomai faapitoa ma mo ituaiga amioga lē pulea tau tomai faapitoa e faatonutonuina e Tulafono Faatonutonu.

- Fuaiupu 34:** - ua aiaia ai mo vasega o tagata o i latou ia e mafai ona faia se faasea i le Fono e uiga i le solia ai e se faiaoga o se tulaga faataatia tau tomai faapitoa.

- Fuaiupu 35:** - ua aiaia ai mo le iloiloga o faasea e le Fono.

- Fuaiupu 36:** - ua aiaia ai mo le faasee atu o faasea i isi lala sooupu e pei o le Komesina o Leoleo po o le Komisi o le Aufaigaluega o Galuega a le Malo.

- Fuaiupu 37:** - ua aiaia ai mo le malosiaga o le Fono e suesueina ai se faasea ma le faasee atu o faasea i le Komisi Faamasino.

*Vaevaega 3 - Komisi Faamasino mo Faiaoga*

- Fuaiupu 38:** - ua aiaia le faavaeina o le Komisi Faamasino mo Faiaoga ma ona sui.

- Fuaiupu 39:** - ua aiaia ai malosiaga o le Komisi Faamasino mo Faiaoga e fofogaina ma faia ai faaiuga o talosaga tetee e faasaga i faaiuga a le Fono po o faasea e faasaga i se faiaoga ma isi tulaga faapena.
- Fuaiupu 40:** - o taualumaga a le Komisi Faamasino e ao ona faatonutonuina e tulafono faatonutonu.
- Fuaiupu 41:** - o malosiaga o le Komisi Faamasino e faaee atu ai faasalaga.
- Fuaiupu 42:** - ua aiaia ai mo talosaga tetee i le Faamasinoga Sili i luga o se tulaga e fesiligia ai le tulafono.

**VAEGA 5  
AIAIGA ESEESE**

- Fuaiupu 43:** - ua faia ai soligatulafono ma latou faasalaga.
- Fuaiupu 44:** - ua aiaia ai mo mataupu ua faamaonia e ala i se tusi faamaonia o faamatalaga molimau lea ua sainia e le Resitara.
- Fuaiupu 45:** - ua aiaia ai le tuusaunoa ai o se sui, Fono, Komisi Faamasino, Resitara po o so o se tagata i lalo o lenei Tulafono mai noataga tau le tagata lava ia mo so o se gaoioiga ua faia i le loto lelei.
- Fuaiupu 46:** - ua tuuina atu ai le malosiaga i Le Ao o le Malo, i le faia i luga o le fautuaga a le Kapeneta, e faia ai tulafono faatonutonu.
- Fuaiupu 47:** - ua soloia ai le Vaega X o le Tulafono o Aoga 2009.
- Fuaiupu 48:** - ua aiaia ai mo aiaiga tau soloaiga ma aiaiga faasaoina.

.....  
(Hon MAGELE Mauiliu Magele)  
**MINISITA O AOGA, TAALOGA MA AGANUU**